

Ama' yej kijkuiloj San Pablo iga tokniwan yej chantitokej altepe' Éfeso Efesios

Pablo kijkuilowiliá yej kitokaj Jesús yej chantitokej altepe' Éfeso

¹ Ne¹ niPablo, iyapó¹stol* Jesucristo, ken tiki-jtowaj, se yej yéj kititan, iga Dios ijkón kine'. Nimitzijkuilowiliáj inín ama' yej ankitokaj Dios iwán ankiçredowaj Jesucristo yej anchantitokej altepe' Éfeso.

² Dios yej toTaj iwán toTeko Jesucristo mamitzyolchikawakan iwán makichiwakan iga pan amoalmaj xonokan tamelá.

Dios teyolchikawa iga tiktokaj Cristo

³ Matikweyimatiltikan yej iDios iwán iTaj toTeko Jesucristo iga Dios tema'ya ipan toespíritoj nochi yej yékti yej ono' ipan cielo iga tisetitokej iwán Cristo.

⁴ Dios tetapejpen áchtosan, este kuá' aya mochiwaya inín tajli, iga matisetitokan iwán Cristo, iga matimochiwakan de yéjpasan iwán iga matikchijtokan iyixtaj yej yéj kineki.

⁵ Dios iga tepoxchokilij, kejlán este ikyay iga tetapejpen iwán kititan Jesucristo iga matimochiwakan nokta ipilowan, ijkón Dios kiye'ita.

* **1:1 1:1** Xikita glosario "Apóstol".

⁶ Dios poxsan te-iknelij iga teomemawij iga yej kichij ipiltzin yej poxsan kineki, ijkón kajasi iga matikweyimatiltitokan.

⁷ Iga iyesyó Cristo kitoyaj kua' migui', temānawij iwán teelkawilij yej ayekti tikchijkej, inón kichij iga tepoxiknelij.

⁸ Dios iga tepoxchokiliá, tematiltij yej matikchiwakan iwán iga matikixmatikan iyojwi.

⁹ Tenextilij yej iyantoya, yej yéj kejlantoya iga tejemen, ken yéj kiye'ita' iga ipan Cristo kine' mamochiwa.

¹⁰ Dios yawi kichiwati kua' yéj nokta kinekis iga kisetilitij nochi yej ono' ipan cielo iwán yej ono' ipan tajli iga Cristo makimandaro.

¹¹ Iwán iga tisetitokej wan Cristo inán timotapialiaja, iga Dios temá' yej yéj itatki, tetapejpentoyay iga Dios ijkón nokta kejlantoya, iga kichiwa ken yéj kiye'ita.

¹² Ijkón Dios kichij iga nejemej nijudiyojmej áchtosan maniksentalikan noalmajmej pan Cristo iwán manikweyimatiltikan.

¹³ Amejemen nō ankikakikej mela'ye'noticiaj yej tasalvarowa iwán ankicredoijkej Cristo. Dios mitzmakakej iyEspírito Santo iga manésiya iga amejemen itátkiya yéj, yej ikyay kijtoj iga yawi mitzmakati.

¹⁴ Iga Dios temá' iyEspíritoj, tenextiliá iga yéj yawi temakati majo' yej yéj itatki. Íkuā' kisalvarowa nochi tokniwan yej yejpa itatki iwán nochi kiweyimatiltiáj.

Pablo kitajtaniliá Dios iga makipalewikan yej kitokaj Jesucristo

15 Inón iga nej, kuá' níkgui' iga amejemen anmoconfiarowaj ipan toTeko Jesucristo iwán anmochočiliáj wan yej kitokaj Dios,

16 ayá' níkjéwa iga níkmaka gracias Dios iga amejemen. Nochipa nimitzejlamikij kuá' nitajtowa wan Dios.

17 Niktajtaniliá iDios toTeko Jesucristo, toTaj yej kipoxpiá poder, iga mamitzmakakan iyEspíritoj iga xikmatikan te xikchiwakan iwán xikmatikan máj Dios.

18 Nō niktajtaniliá Dios iga mamitztawikan pan amoalmajmej iga xikmatikan te iga mitznōtzkej, iwán xikmatikan nō yej pox yēkti yej Dios yawi kimakati inōmej yej yéj itatki.

19 Níkneki xikmatikan iweyi poder yej akipiá kan tanto', inón tepalewiá kuá' tiksentālijtokej toalmaj pan Cristo. Injnsan iweyi poder yej Dios kinextij

20 kuá' kojpa-ixitij Cristo iga miktoya iwán kitālij ilādoj iye'mā' ipan cielo.

21 Ompa kitālij Cristo iga máj mamandaro que nochi espíritojmej yej kipiáj poder iwán nochi yej mandarowaj pan cielo, ipan inin tajli yej inán ono' iwán yej wī'o'.

22 Dios kitālij Cristo iga makimandaro nochi, iwán nō kitālij iga maono ken tzontekon pan nochi tokniwan yej kitokaj toTeko.

23 Yej tiktokaj Cristo, tejemej icuērpōj. Yej tiktokaj Cristo atikpolowaj nité iga yéj nōyan ono wan nochi kipiá.

Dios teyokamanawia

¹ Cristo mitzojpa-ixitijkej iga anmiktoyaj iyixtaj Dios iga ankichijtoyaj yej ayekti.

² Inón ankichijtoyaj ikya, kensan kichiwaj yej akixmatij Dios, san ken kineki Tzitzimi' yej mandarowa ipan ejeka', iwán yej nō kichiwaltia yej ayekti inomej yej akichiwaj ken kineki Dios.

³ Ikya nochi tejemej ijkón nō tinemiáj, tikchiwayaj san ken kinekia toalmaj, iwán san ken tikejlamikiáj, inón iga teajasia iga Dios matecastigaro kensan sekin.

⁴ E' Dios pox te-iknelia iga pox techokilia,

⁵ malej iga tejemen timiktoyaj iyixtaj Dios iga tikchijtoyaj yej ayekti, Dios teojpa-ixitij wan Cristo. Dios ken temakokawia iga tiye'onoskej wan kiye'ita iga matemanawi.

⁶ Dios teojpa-ixitij wan Cristo Jesús, iwán teewatoltij itenoj kan ono' ipan cielo.

⁷ Ijkón kichij iga makinexti pan mia' xiwi' yej wi'o', iga tepoxye'ita iwán pox te-iknelia iga timoconfiarowaj ipan Cristo Jesús.

⁸ Dios mitzmanawijkej iga mitzchokiliaj iga ipan anmoconfiarojkej; iwán inin ayej iga amoganaj ankichijkej, sino que Dios mitzyokamakokawijkej.

⁹ Inin ayej iga tejté tikchijkej iga tiktankej, iga amo agaj mamoweyimati.

¹⁰ Tejemen Dios teojpachij iga matischenemikan wan Cristo Jesús, iga matikchiwakan yej yekti, iga ijkón yej áchtosan kejlan ken matinemikan.

Tonokej tamela ipan Cristo

11 Inón iga amo xikēlkawakan iga amejemen ayéj anjudiyojmej; judiyojmej mitzijliayaj “in-circuncisos”^{*} iga yejemej nochi tajtaga' mojliáj “circuncidados” iga yejemen inón kitekichiwaj.

12 Íkuá' amejemen aya ankixmatiáj Cristo, judiyojmej mitzitatej iga anwejkachanejkej, ayá' ankixmatiáj te motajoltijkej Dios wan israelitajmej niga yej kijtoj iga yawi kichiwati. Amosēti amonoyaj ipan inín tajli iga ayá' ankixmatiáj Dios wan ayá' ankimatiáj siga wel anmomanawiyajaj.

13 E' inán iga ansenemij wan Cristo Jesús, amejemen yej amonoyaj wejka iga Dios, ankina'techójkeja iga migui' Cristo iga amejemen.

14 Cristo kichij iga matonókanya tamelá. Yéj kichij iga judiyojmej iwán yej ayéj judiyojmej mamochiwakan ken sesan, iga Dios kixixitinya inón yej tayojoykatijtoya iga mo-ixitayaj.

15 Kuá' mi' Cristo, ompa tami' iley Moisés wan nochi yej tatekimaka. Yej judiyojmej iwán yej ayéj judiyojmej mochij ken sesan taga' iga kisentokaj Cristo. Ijkón kichij iga matonókanya tamelá.

16 Kuá' mi' ipan cruz, Cristo kichij iga matami iga mo-ijiyayaj yej judiyojmej iwán yej ayéj judiyojmej iwán mochijkej ken sesan taga'. Inán wel tonochimej tonoskej tamelá iyixtaj Dios.

17 Cristo wálaj iwán kipowa' ye'noticiaj ken wel matonokan tamelá iyixtaj Dios tonochimej, yej ayéj judiyojmej yej wejkatitoyaj iga Dios iwán judiyojmej yej ken na'san onoyaj wan Dios.

* **2:11 2:11** Xikita glosario “Circuncisión”.

18 Iga Jesucristo mi' iga tejemen, tonochin yey tijudiyojmej iwán yey ayéj, inán wel tasij itenoj toTaj iga inonsan iyEspíritoj Dios.

19 Inón iga inán amejemen ay'ya anwejkachanejkej, niga ayo' amonokej ipan tajli yey ayéj amotatki. Inán ansetiakej iwán inomej yey itatki Dios iwán nō anmochíjkeja ipilowan Dios.

20 Wán amejemen inán ken se weyi kajli yey taksato' pan yey tenextilij apostolejmej wán profetajmej,† iwán Jesucristo nokta ken tikita achto te'ti kan tajtaksato' inón kajli.

21 Iga tisetitokej wán Cristo, ken yoli' yoli' tejkatiá kajli te que yekawi se tiopan yey yokachijto' iga toTeko.

22 Ijkonan nō amejemen, iga ansetitokej wán Cristo, anmosenechkowaj iga mamitzchiwakan ken se kajli kan maono iyEspíritoj Dios.

3

Dios kititani Pablo iga makipowili ye'noticiaj yey ayéj judiyojmej

1 Inón iga nej Pablo, nipresojtito' iga nikchiwa ken kineki Cristo Jesús; nitekipanowa iga xiye'onokan amejemen yey ayéj anjudiyojmej.

2 Ankimátija iga Dios ne-iknelij iga nemá' inín tekipanól iga manimitzpalewikan.

3 Dios nenextilij yey iyantoya iwán nematiltij, ijkon ken nimitzijkuilowilíjkeja achi ipan inín ama'.

4 Kuá' ankixpowaskej inín, ankimatiskej iga nikmátija yey iyantoya, yey Cristo kichiwako.

† 2:20 2:20 Xikita glosario "Profeta".

⁵ Inón yej to-ikyapatajwan ayá' kimatikej; e' inán Dios, iga iyEspíritoj kinextilij iyapostolejmej iwán iprofetajmej.

⁶ Inınwa' in yej aya momatiá: Jesucristo no wel kimanawiá yej ayéj judiyojmej iga mamochiwakan sesan wan judiyojmej; iyomextin mochiwaskéj ken tikita sesan taga' iga Dios kimakas nochí yej kijlij judiyojmej iga yawi kimakatij.

⁷ Malej iga aneajasi, Dios ne-iknelij iwán netalij iga wel manitekipano iga manikpowa ye'noticiaj.

⁸ Nej yej máj até noteki que nochí yej kitapejpen Dios iga itatki; e' yéj kiye'ita iga manikpowili ye'noticiaj yej ayéj judiyojmej. Inón ye'noticiaj tematiltiá yej kichij Cristo iga tejemen, yej pox valerowa iwán ayagaj wel kaxiliá ipatiyo.

⁹ Dios, yej kichij nochí yej tikitaj, kine' iga maniknextili nochí gente ken yéj kichiwás, yej desde ikya ayagaj kimatiá.

¹⁰ Ijkón angelejmej* yej onokej ipan cielo iwán espíritojmej yej kipiáj poder, kitaj ipan toknimej yej kitokaj Dios, iga Dios nokta kipoxmati te kichíwa.

¹¹ Dios kichij ijkón kensan kejlantoya pox ikay, inón kichij iga kititan toTeko Cristo Jesús.

¹² Iga tiktokaj Cristo, inán ayá' tipinawaj iga tikna'techowaj Dios, iga timoconfiarowaj ipan yéj.

¹³ Inón iga nimitzijliáj, amo ximoknomatikañ iga nemi ne-iknochíwaj iga amejemen. Inın iga amejemen xiye'onokan.

* **3:10 3:10** Xikita glosario "Ángel".

Ken iga tepoxchokiliá Cristo

¹⁴ Inón iga nimotankuaketza iyixtaj iTaj toTeko Jesucristo,

¹⁵ yej kimaka vida nochi yej ono' pan cielo iwán pan tajli.

¹⁶ Niktajtaniliá toTaj yej nochi wel kichíwa iga mamitzmakakan amotájpál iga iyEspíritoj iga amo ximosemakakan ipan iyojwi.

¹⁷ Nō niktajtaniliá Dios iga Cristo maono ipan amejemej iga anmoconfiarowaj ipan yéj, iwán ijkón xikchokilikán Dios wán ximochokilikán iga inochi amoalmajmej.

¹⁸ Ijkón amejemen wán nochi yej kitokaj Dios, wel xikmela'matikán ken iga Cristo tepoxchokiliá.

¹⁹ Niktajtaniliá iga xikmatikan ken iga techokiliá, malej iga ayagaj wel kimati nochi ken iga Cristo techokiliá, ijkón anmomela'confiarojtoskej ipan Dios.

²⁰ Mamoweyimatilti Dios yej pox wel nochi kichíwa, kichíwa majya sej que yej tiktajtaniliáj. Awel niga tikojasij yej Dios wel kichíwa ipan tejemej iga tepalewiá.

²¹ ¡Tonochimej yej tiktokaj Cristo Jesús matikweyimatiltikan Dios nochipa! Ijkónyawa'.

4

IyEspíritoj Dios tepalewiá iga sesan timochiwaj

¹ Inón iga nej nipresojtito' iga niktoka toTeko, nimitztajtaniliáj iga xiye'nemikan ken kajasi

manemikān yej Dios kinotza, kensan mitznōtzkej amejemen.

² Ximoalimpamatikān, xite-ijiknimej; amo nimanin xikuesiwikān, ximosepanchokilikān iga anmonekij,

³ xiktemokān nochipa iga xonokān tamelá, sesan amoalmajmej ken kineki iyEspíritu Dios.

⁴ Tejemēn yej tiktokaj Cristo tonokej ken sesan cuerpo, ono' sesan Espíritu, ijkón ken Dios mitznōtzkej iga ipan sansé xikchixtokān yej mitzsalvarowaj.

⁵ Ono' sesan toTeko, ipansan sesan kān timonconfiarowaj iwán pan sesan toTeko timobautizarowaj.*

⁶ Ono' se Dios yej nochi iTaj, yéj kimandarowa nochi, nochi kichiwa yej yéj kineki iwán ono' noyan.

⁷ E' sejsé de tejemej temá' iga wel matikchiwakān totekiyo' kenya iga Cristo kine'.

⁸ Inón iga itájtōl Dios kijtowa:

Tejkaj ajko, kiwiga' nō presojmej, yej iyenemigojmej,

iwán kimakokawij tajtaga' yej yēkti.

⁹ ¿Té kijtojneki iga "tejkaj"? Kijtojneki iga achto temoj ipan inin tajli, te iyijtiko yajka.

¹⁰ Yej temojka, yejsan sej tejkaj máj ajko iyixko cielo, inón iga yéj inán noyan ono', ipan cielo iwán pan tajli.

¹¹ Yéjsan kitālij iga sekin maonokān apostolejmej, sekin yej Dios kitajtōlmaka, sekin

* **4:5 4:5** Xikita glosario "Bautizar".

yej kipowiliáj itájtɔl Dios yej aya kixmatij, sekin pastormeŷ iwán nɔ sekin yej tamachtiáj.

¹² Ijkón yéj kichij iga nochi yej kitokaj wel matekipanokan pan itekipánɔl Dios, iga wel nɔ makipalewikan tokniwan,

¹³ te que tonochin matimochiwakan sesan ipan Dios iwán iga matikixmatikan iPiltzin. Ijkón ajachi ajachi tiye'tajlantiaskej iwán matiye'nemikan iga tonoskej kensan Cristo.

¹⁴ Ayo' matinemikan ken kokone' yej nijni-jiga kiwigaj ejeka' kuá' nejnemij. Ono' nokta yej tamachtiáj iga takajkayawaj iwán kinekij matekajkayawakan iwán matewigakan pan yej ayéj ye'oŷti. Amo ijkón matechwilikan.

¹⁵ Iga timochokiliáj, matikijtokan yej mela'ciertoj, ijkón nochi tikchijtiasekej ken Cristo tenextiliá, iga yéjwa' in toztontekon.

¹⁶ Cristo ken toztontekon nochi yej tiktokaj, wan tejemen ken icuerpoj. Sejsé tikpiáj totekiyo, wan tisen-onokej, tisentekipanowaj wan nemi tikuij totájpál iga timosepanchokiliáj.

Yej kitoka Cristo, se'pay manemi

¹⁷ Inin inán nimitzijliáj iwán nimitztajtaniliáj ipan itoka' toTeko Jesús iga ay'ya máj xikchijtokan ken kichiwaj yej ayá' kixmatij Dios. Yejemen san kixeto'chiwaj ken kineki iyalmajmej.

¹⁸ Yejemen ayá' ye'tajlamikij iga onokej ken kan takomichkan, yejemen ayá' kipiáj vida yej Dios temaka tejemen iga yoltakuaktikej, inón iga ayá' niga kixmatij.

19 Yejemen ken ay'ya xaya'yojkej iga ayo' pīnawaj, kimela'yolmakákeja iga kichiwaj yej pox ayejyekti iwán inonsan kiyoltilantokej.

20 E' amejemen, kuá' ankređojkej Cristo, ayéj ijkón mitzmachtijkej,

21 siga melá'wa' ankikakikej yej mitzpowilijkej de Jesús, iwán siga mitzmachtijkej kensan Jesús tanextiliá.

22 Xikajtewákanya ken ikya ankichijtoyaj; xikixtikān ipan amoalmaj yej mitzyołtilantoyaj iga ankichijtoyaj yej ayekti, inón mitzpojpolojtoyaj iga anmokajkayajtoyaj.

23 Ximomakákanya iga Dios mamitzyolpatakan wan ken iga antajlamikij,

24 iwán xikchijtokanya yej yekti ken kineki Dios iwán nésisya iga melá' anye'némija.

25 Inón iga ayo' xitakajkawakan, sejsé de amejemen amo makikajkawawa iyiknīn, iga tejémempasan iga pansan se cuerpo tisetitokej.

26 Siga ankuesiwij, amo iga inón xikchiwakan yej ayekti iwán amo xikuesitokan semilwi'.

27 Niga ximomakakan iga Tzitzimi' makalaki pan amoalmaj.

28 Yej tachtekiá, ayo' matachteki, mapéwaya ga maye'tekipano iga matatani, iga wel makipalewi yej ayá' motapialia.

29 Amo xikijtokan tájtōl yej ajayekti. Majwa' xikijtokan yej ye'tájtōl yej makipalewikan yej kitokaj toTeko.

30 Amo xikchiwakan iga mamoknoḡmati Dios iyEspíritoj. Mitzmakakej iyEspíritoj iga

manésiya iga amejemen itátkiya yéj este kua' wi' Cristo iga mitzsalvarokij.

³¹ Amo xiyolchichixtokan iga ankuesiwij, amo xitajtaweltajtokan, amo xiktzatzajtzilikan amoknin, niga xikmalijlikan agaj, iwán xikajtewakan nochi yej ayekti.

³² Majwa' xite-ijiknimej, ximo-iknelikan, ximoperdonarowilikan yej anmochiwiliáj, ijkón ken Dios ipan Cristo Jesús mitzperdonawilijkej nochi yej ankichijkej yej ayekti.

5

Ken iga manemikan yej ipilowampa Dios

¹ Amejemen ipilowan Dios yej mitzpoxnækij; xiktemokan iga xikchiwakan kensan yéj kichíwa.

² Ximosepanchokilikan, kensan Cristo techokiliá, iwán motemá' iga mi' ga tejemen. Kua' mi' Cristo, Dios kiyé'ita' ken kua' se yolka' kimiktiliáj iwán ajwiya' kua' tata.

³ Amejemen yej Diospay itatki, ni alín ayo' xikijtokan iga agaj moteka iwán yej ayá' íwan namiktito', niga nokta xikijtokan yej ajayekti, niga xikejlamikikan iga ankipoxpiasnekij kua-juantas.

⁴ Amo xikijtokan tájtól yej tipinawaj iga tikakij, niga xeto'tajtolmej, niga tajtolmej yej pox ayekti iga mamó-ijto, iga nochi inín ayá' kajasi iga xikijtokan, majwa' xikmakakan gracias Dios.

⁵ Ankimátija siga agaj moteka iwán yej ayá' namiktito', o kichíwa tejté yej ayekti o kipoxpiasneki kuajjuantas, inonwa' kenkua' kiweyimati

ídolo iwán ayá' kajasi iga Cristo iwán Dios marreina^{ro}* ipan yéj.

⁶ Amo agaj mamitzkajkayawakan iga xeto'tajtölme^j, inón iga Dios yawi kicastigarotij yej ayá' tagatakakij.

⁷ Amejemen amo ximotokakan iwán inomej yej kichiwaj yej ayekti.

⁸ Amejemen ikya amonoyaj kenkua' kan tamichkan, e' inán amonókeja kan taxotalpan iga ankixmatij toTeko; xinejnemikanya ken yej nemij nokta kan taxotato'.

⁹ Iga yej kipiá iyEspíritoj Dios pox te-ijiknín, ye'nemi, iwán atakajkayawa.

¹⁰ Xikixmatikan yej kiye'ita toTeko.

¹¹ Amo ximotokakan wan yej onokej ken kan takomichkan iga kichiwaj yej ayá' teonkixtiá, majwa' xiknextilikan iga ayompa kichijtokej.

¹² Te tipinawaj iga tikpowaj yej yejemen kich-takachiwaj.

¹³ E' kua' nóchiya momati, nité ayo' iyantos, iga inón yej kitawia, kinextiá siga se ye'nemi o ayá'.

¹⁴ Inón iga mojtowa:

Xisa, tej yej tikochto';

xi-ojpa-isa iga timikto',

iwán Cristo yawi mitztawiti.

¹⁵ Inón iga ximo-itakan ken iga annemij. Amo xonokan ken yej ayá' kixmati yej yekti, sino que ken yej kimati te mochíwa iga nochi maye'kisa.

* 5:5 5:5 Xikita glosario "Kén iga Dios reinarowa".

16 Amo xiknempolokan kua' wel agaj ankichiwiliáj yej yekti, iga inimej día pox ono' yej ayekti kichiwaj.

17 Amo ximoxeto'tilikan; xikmatikan katiapa yej Dios kineki iga xikchiwakan.

18 Amo xitawanakan, iga yej tawana mopolowa, majwa' ximomakakan iga iyEspíritoj Dios mamitznentikan.

19 Kua' anmonechkowaj, xikuikakan yej ijkuilijto' ipan salmos, iwán takuj' yej kajasi iga mokuikiliá Dios wan tepalewiá iga timoconfiarowaj pan yéj. Xiktakuikilikan iwán xikweyimatiltikan toTeko iga nochi amoalmajmej.

20 Nochipa xikmakakan gracias toTaj Dios iga nochi yej temaka, ipan itoka' toTeko Jesucristo.

Ken manemikan yej kitokaj Cristo

21 Ximosepancredokan iwán ijkón nesis iga ankimajmawiliáj Dios.

22 Siwa' yej weweyjoj makicredo iwéj, ijkón kensan kicredowa yej tatekimaka toTeko Jesucristo.

23 Iga taga' tzontekon iga isiwa', ijkón kensan Cristo tzontekon iga nochi yej kitokaj. Cristo kimánawiá yej kitokaj wan yejemen ken icuerpoj.

24 Ijkón ken yej kitokaj Dios kichiwaj ken kineki Cristo, ijkonsan nō siwa' nochipa mackichywa ken kineki iwéj.

25 Taga', xikchokili mosiwa', ijkón ken Cristo kichokilij yej kitokaj Dios iwán mi' iga nochi tejemej.

²⁶ Cristo kichij iga tejemej matimochiwakan itátkisan; tepajpa' iga a'ti wan iga itájtol.

²⁷ Inón kichij iga tejemen yej tiktokaj matonokan ken isiwa' Cristo. Wan mate-ita iga tipoxye'nemij iga atikpiáj nité nokta yej yéj akiye'ita wan tonóskejsan iga yéj.

²⁸ Ijkón nō se taga' makichokili isiwa' kensan yéj mochokiliá. Yej kichokiliá isiwa', yéj nō mochokiliá.

²⁹ Iga ayagaj mo-ijiya igánajsan, majwa' mo-tamaka iwán mocuidarowa, ken Cristo kichíwa wan yej ípan kicredowaj;

³⁰ iga tejemen yej tiktokaj Cristo, icuerpoj nokta, tejemen inakayo iwán iyomiyomej.

³¹ Ijkín kijtowa itájtol Dios: "Inón iga taga' kikajtewas itaj iwán iye' iga mosetilij iwán isiwa', iwán inón ome mochíwas sesan."†

³² Yej inín temachtiáj, pox valerowa iwán ay' iyanto'; nej nikijtowa iga inín tajtowa de Cristo iwán tejemej yej tiktokaj.

³³ E' nō nikijtowa iga xikchokili mosiwa' kensan tej timochokiliá, iwán siwa' makiye'ita iwéj.

6

Pablo kinonotza tetajmej iwán tepilowan

¹ Tepilowan, xitagatakakikan kua' te mitzijliáj amotaj amoye', xikchíwakan iga toTeko ankitokaj, iga inín sí yekti.

² Ono' diez mandamientos; sekin tenextiliá iga Dios kimakas tejté agaj yej ijkón kichíwa. Yej

† 5:31 5:31 Gn 2:24

achto mandamiento yej ijkón tenextiliá, ijkín ijkuijito': "Xikye'ita motaj iwán moye',

³ ijkón tiye'onos, iwán tiwejkawas iga tonos ipan inín tajli."

⁴ Iwán amejemen tetajmej, amo xikuejkuesokan amopilowan, majwa' xiknonotzakan iwán xikojkuitikan pan iyojwi toTeko.

⁵ Amejemen yej an-esclavojmej,* xikchiwakan yej mitztekimakaj amoteko yej ono' ipan inín tajli, xikye'itakan, xik-respetarokan iwán amo xikajkayawakan, xitekipanokan ken kuá' nemi antekipanowaj iga Cristo.

⁶ Xitekipanokan iga yejemej aya'san kuá' mitzitztokej iga mamitzye'itakan, xikchiwakan ken kuá' Cristo itekipanol nemi ankichiwaj, xiyolmakakan iga xikchiwakan ken Dios kineki.

⁷ Xiyolpakikan iga antekipanowaj ken kuá' nemi antekipanowaj iga toTeko, ayéj iga agaj.

⁸ Ankimátija iga sejsé de amejemen, an-esclavojmej o ayéj, mitzmasukkej toTeko kensan ankichijkej yej yekti.

⁹ Amejemej itekomej esclavojmej, ijkonsan no xikchiwakan wan amoesclavojmej, amo xikijtokan: "Nia nimitzmagati siga atikchiwa motekipanol." Xikejlamikikan iga yejemej iTeko, yejsan no amejemempa amoTeko yej ono' ipan cielo, yej ayá' sesan kiyé'ita.

Ken xikchiwakan iga Tzitzimi' amo mamitztanilikan

* 6:5 6:5 Xikita glosario "Esclavo".

¹⁰ Iwán inán nokniwan, ximomela'confiarokan ipan toTeko iga yéj nokta mitzpalewiáj iga iweyi poder.

¹¹ Ximotaajakikan iga ken armadura yej kakiáj iga momanawiáj yej yawij kan momijmiktilo; e' inimpa ayá' mo-ita, inín ipoder Dios yej mitzmakaj iga amo mamitzkajkawakan Tzitzimi'.

¹² Iga ayá' nemi tikchiwaj iga matiktanilikan agaj yej nakayoj iwán omiyoj, sino que nemi tikchiwaj iga matiktanilikan Tzitzimi' iwán iyangelejmej yej onokej pan cielo, yej mandarowaj ipan inín tajli kan mochijto' yej ayekti.

¹³ Inón iga xikuikanya nochi iga yej amomanawiáj, yej Dios mitzmakaj, iga wel ximomanawikan kuá' Tzitzimi' mitzchiwilijnekij yej ayekti, iwán kuá' nóchiya ankijyowijkej, anye'isatoskej ipan iyojwi Dios.

¹⁴ Xiye'isatokan; nochipa xikijtokan yej mela'ciertoj iwán ijkón kenkuá' antajko-ilpitokej iga anmomanawiáj, iwán nochipa xikchiwakan yej yekti iwán ijkón kenkuá' anmoeltzakuaj iga kuacht de tepos.

¹⁵ Ken se soldado nochipa kakijto' iga', ijkón no amejemen nochipa xikpowakan itájtol Dios yej kichíwa iga maonolo tamelá.

¹⁶ No ximoconfiarokan pan Dios, iga ijkón ken kuá' ankipiáj amoescudoj† iga ximomanawikan kuá' Tzitzimi' kinekis mamitzmimakan iga mitzknochiwaj.

¹⁷ Iwán no xikejlantokan pan amoalmaj iga

† **6:16 6:16** Xikita glosario “Escudo”.

amejemej Diosya mitzmañawijkej, ininwa' ken kua' se kitaliá ikaskoj ipan itzontekon iga momañawiá. Xiknentikan itájtol Dios pan amoalmaj, inonwa' espada‡ yej iyEspíritoj Dios mitzmakaj.

¹⁸ Nochipa xiktenewikan Dios wañ xiktajtaniłikan ken iyEspíritoj mitztajtolmakaj. Ijkonsan nochipa xikchijtokañ, wañ xiktajtaniłitokañ Dios iga nochi yej kicredojokej pan yéj maye'onokañ.

¹⁹ Xiktajtaniłikan Dios no iga nej, iga manejajtolmaka iwán kua' nitajtowa amo manimajmawi, iwán iga wel manikmati te manikijto kua' nikpowa ye'noticiaj yej nematiltij.

²⁰ ToTeño neñitan iga manikpowa ye'noticiaj, inón iga inán nipresojtito'. Achi xiktajtaniłikan Dios iga manepalewi iga amo manimajmawi iga nikpowa ye'noticiaj ken kajasi.

Pablo tanawatiá

²¹ Tíquico, yej tóknimpa yej nikpoxchokiliáj, ayá' kikajtewa iga nepalewiá ipan itekipánol toTeño, yéj yawi mitztatapowitij de nej iwán yej te nemi nikchiwa.

²² Inón iga nimitztitaniliáj Tíquico, iga mamitziłikan ken nonokej iwán iga mamitzyolchikawakañ.

²³ Dios yej toTaj iwán toTeño Jesucristo makichiwa iga xiye'onokañ iwán xonokañ tamelá.

²⁴ Ken iga Dios kiye'ita makichiwa ipan nochi yej ayí' kikajtewaj iga kipoxnekij toTeño Jesucristo. Ijkónyawa'.

‡ 6:17 6:17 Xikita glosario “Espada”.

Isthmus-Mecayapan Nahuatl
Nahuatl, Isthmus-Mecayapan: Itájtōl toTēko ipan
mela'tájtōl New Testament

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source
files dated 17 May 2025

8d5b6a33-8846-5c0f-ae8f-62c94f894f7b